

灼

艾

集

灼艾餘集目錄

卷一

杜陽編

畜德錄

鶴林玉露

近代名臣錄

卅鉛餘錄

松窗寤言

卷二

自警編

震澤長語

郊外農談

灼艾餘集目錄終

灼艾餘集卷之一

四明萬表選集

男達甫訂証

孫邦孚重梓

杜陽編

吳元濟之亂淮西以宰臣裴度為元帥及對於殿上
曰為蔡稱兵朕於擇帥甚難其人且安天下用將帥
如造大舟以越滄海其功則多其成則大一日萬里
無所不屆若乘一葉而蹈洪波其功也寡其覆也速
朕今托元老以摧狂寇真謂一日萬里矣度曰微臣
無狀叨蒙大用惟慮一丸之卵不足以勝太山歟段

之馬不足以行千里但竭臣至忠以快宗廟之靈臣雖不才敢以效命泣下沾襦若不勝語上亦為之動容

王沐者王涯再從弟也家於江南老而且窮以涯執相權遂跨蹇驢至京師索米餽舍經三十餘月始得一見涯於門屏所望不過一簿尉耳涯潦倒無鴈叙之情大和九年秋沐方說涯之嬖奴以導涯欲涯始一召見款曲而許微官處焉自是旦夕造涯之門以俟其命及涯敗露伏法仇士良收王氏家族沐方在涯私第以為族人被執而腰斬之

羅浮先生軒轅集年過數百而顏色不老立於床前則髮垂至地坐於暗室則目光可長數丈每採藥於深巖峻谷則毒龍猛獸往來衛護或晏然居家人有其齋邀之雖一日百處無不分身而至或與人飲酒則袖出一壺繞容一二升縱客滿座而傾之彌日不竭或他人命飲即百升不醉夜則垂髮於盆中其酒歷歷而出麴蘖之香輒無減耗或與獵人同群有非同遊者俄見十數人儀貌無所間別或飛朱篆於空中則可留千里有病者以布巾拂之無不應手而愈及上召入內庭遇之甚厚每與逆客論道率皆叶於

土意因問曰長生之道可致乎集曰撤聲樂去滋味
哀樂如一德施無偏自然與天地合德日月齊明則
致堯舜禹湯之道而長生久視之術何難致哉

畜德錄

文皇忌漢王英勇乃私召問隆平侯張信信艱然對
曰事干天常豈易為邪 文皇大怒拔劒擊折信齒
衣盡血漬少焉賜更新衣曰直臣也事遂寢

解學士縉應制題虎顧衆彪圖曰虎為百獸尊誰敢
觸其怒惟有父子情一步一回顧 文皇素不喜
仁宗感此詩甚思時 仁宗留守南京頗懷憂虞因

命所親信者莫如夏原吉即日往迎之可謂得諷體矣

夏忠靖公原吉嘗得賜古硯冬月更炙冰破甚恐公知召諭之曰受賜不加愛惜吾之罪也釋之咏螭首詩後四句云昂昂飽歷風霜古默默深承雨露滋寄語羣飛諸燕雀好來相近莫相疑人議公太和蓋性度寬大其言如此

楊文定公溥執政時其子自鄉來云道出江陵獨不為縣令所禮乃天台范公理也文定深重之即擢為德安知府再擢貴州左布政使或勸當致書范公曰

宰相為朝廷用人○非私於理也○聞文定卒○乃祭而哭○之以謝知已○

于肅愍公謙為兵部尚書○當己巳之變○議者請燒通州倉以絕虜望○公曰○國之命脉○民之膏脂○顧不惜邪○傳示城中○有力者恣取之○數日粟盡入城矣○

魏文靖公驥嘗以俸金百兩委人為其家僕○盡易之○公竟不言他日○事覺○鞠出金還公○其主始知○公嘗語人為子者○當求名醫厚結之○親有疾○則信之○必專彼召之○必速來也○公為尚書北還○一小舟常阻於要津○其子稍設儀仗○公見即命撤去○曰○豈藉重於是耶○

禮部尚書姚公夔天順癸未春知貢舉試院災天下
貢士死者相籍請諭祭於郊祭畢自謂不能致防殃
及賢俊拜於地慟哭觀者以萬數哀震數里

王文端公直在吏部時其子為南京國學博士考績
在部文選郎中欲留侍公改北學公不可曰是亂法
自我始矣

都御史韓公雍征大藤峽出兵令五鼓戰將領者聞
賊已覺恐遲失事二更即發大破之公賞其功而問
以違令之罪以軍法當斬乃具聞請釋曰萬一不用
命而敗奈何人謂公得將將之體

公與夏公頃飲各出酒令公欲一字內有大人小人復以諺語二句証之曰傘字有五人下列衆小人上侍一大人所謂有福之人人服事無福之人服事人夏云爽字有五人旁列衆小人中藏一大人所謂人前莫說人長短始信人中更有人

周文襄公忱巡撫江南時嘗去騶從入田野間與村夫野老相語問民間疾苦每坐一處使聚而言之惟恐其不得盡也

東山公當發戍氈帽布袍徒步過大明門匍匐頓首乃行策一蹇驢赴戍所時以兵部尚書謫發莫不

加禮不欲至成公曰大夏有罪不加之誅今復不服
役耶彼甲持銳與諸卒無異莫不歎服

吳文定公寬為脩謨時有同年賀恩寢疾將不起欲
易簀託於公之旁廡公即掃室請遷及卒奉殮于中
堂使子衮衮以荅弔者又故人之子有事於京中書
託公主之久而有疾不起為棺殮及檢帳有輸官銀
若干盡喪于娼家公為如數償之遣人送喪歸

華公懋為南京國子祭酒有監生請假託言一力採
薪不至將往求之公聞之愕然曰薪水之資託有失
柰何憂動顏色使亟求且冀得之當復我此生甚悔

曰公待我以誠柰何詒之明日返命具實謝罪
何編修璿當劉瑾用事諸司有事不往見約相見長
揖不得與諸司同其僚以事謁瑾畏其勢不覺屈跪
何公疾聲曰禮惟長揖何以為此瑾曰先生之言是
不敢少有屈懾

鶴林玉露

歐陽公問一僧曰古之高僧有去來翛然何今世之
鮮也僧曰古人念念在定慧臨終安得而亂今人念
念在散亂臨終安得而定公深然之此說却是正理
如吾儒易簣結纓之類皆是平日講貫得明操守得

定涵養得熟視死生如晝夜故能如此不亂靜春先生劉子澄朱文公高弟也病革周益公推之曰子澄澄其慮靜春開目微視曰無慮何澄言訖而逝

世傳呂洞賓唐進士也詣京師應舉遇鍾離翁于岳陽授以仙訣遂不復之京師今岳陽飛吟亭是其處也近時有題絕句于亭上云覓官千里赴神京鍾老相傳蓋便傾未必無心唐事業金丹一粒誤先生余酷愛其旨趣蓋夫子告沮溺之意也

或曰用兵之法殺人如殺艸使錢如使水余曰軍無賞士不往軍無財士不來使錢如使水可也乃若殺

人如殺州則非至論夫軍士固以嚴濟然禮樂慈愛
戰所蓄也所以不得已而誅不用命者蓋一有逗撓
亂行則三軍暴骨矣誅一人所以全千萬人豈以多
殺為能以嗜殺為貴哉若如所言則趙充國王忠嗣
曹彬反不若白起輩矣

宋淳熙中王季海為相奏起汪玉山為大宗伯知貢
舉且以書速其來玉山將就道有一布衣之友平生
極相得屢黜於禮部心甚念之乃以書約其胥會於
富陽一蕭寺與之對榻夜分密語之曰某此行或者
典貢舉當特相牢籠省試程文易義胷子中可用三

古字以此為驗其人感喜玉山既知舉搜易卷中果有冒子中用三古字者遂徑批上置之前列歷折號乃非其友人也私竊怪之數日友人來見玉山怒責之曰此必足下輕名重利售之他人何相負乃如此友人指天誓曰某以暴疾幾死不能就試何敢漏泄於他人玉山終不釋然未幾以古字得者來謁玉山因問之曰老兄頭場冒子中用三古字何也其人泯默久之對曰茲事甚怪先生既問不敢不以實對某之來就試也假宿于富陽某寺中與寺僧閑步廡下見室下一棺塵埃漫總僧曰此一官員女也殯於

此十年矣杳無骨肉來問又不敢自塋之因相語默
然是夕夢一女子行廡下謂某曰官人赴省試妾有
一語相告此去頭場卷子中可用三古字必登高科
但幸勿相忘使妾朽骨早得入土既覺甚怪之遂用
其言果叨前列近已往寺中塋其女矣玉山驚嘆此
事馮北山可久為余言雖近於語怪然亦不可不傳
足以祛人二蔽一則功名富貴信有定分有則鬼神
相之無則雖典貢舉者欲相牢籠至於場屋亦不能
入此豈人之智巧所能為乎一則人黷一念出一言
雖昏夜暗室人所不知而鬼神已知之矣彼欲自欺

於冥冥之中而曰莫予云觀者又惑之甚者也

太學古語云有髮頭陀寺無官御史臺言其清苦而鯁亮也宋嘉定間余在太學聞長上同舍言乾淳間齋舍質素飲器止陶瓦棟宇無設飾近時諸齋亭榭簾幙競為靡麗每一會飲黃白錯落非頭陀寺比矣國有大事讜論間發言侍從之所不敢言攻臺諫之所不敢攻由昔迄今儻節相望近世以來非無直言或陽為矯激或陰有附麗亦未能純然如古之真御史矣余謂必甘清苦如老頭陀乃能攄鯁亮如真御

史

龍洲劉改之詩云退一步行安樂法道三箇好喜歡
緣真西山喜誦之或曰退一步行可也至於道三箇
好乃隨俗徇情耳何足言乎余曰古人直道而行理
之所在驀直行將去仕止久速莫不皆然烏有所謂
退一步者自後世貪榮競進爭一階半級至於殺人
於是始以退一步行為安樂法矣古人是則曰是非
則曰非明白正直曾何回護自後世惡直好佞以直
言賈禍者比比皆是於是始以道三箇好為喜歡緣
矣此處衰世之法也蓋萬事稱好不特司馬德操為
然而吾夫子固有危行言遜之說矣好盡言以翹人

之過此國武子所以見殺也可不戒哉

自文籍既生學者固不可不讀書子路有何必讀書之說夫子斥之至於學詩學易學禮與夫志在春秋行在孝經之說拳拳為其子及門人言之晚而歸魯刪定繫作其功至賢於堯舜則後之欲學聖人者舍書則何以哉然是時詞章之名未立科舉之法未行士之讀書者上則取之以撫世酬物又次則取之以博識多聞下至蘇秦之刺股讀書專為揣摩遊說之計固已陋矣然言詩書為有用之具固未有入耳出口如後世之甚者也蓋於今之士非堯舜文王周孔

不談非語。孟中庸大學不觀言。必稱周程張朱學。必曰致知格物。此自三代而後所未有也。可謂盛矣。然豪傑之士。不出禮義之俗。不成士風。日陋於一日。人才歲衰於一歲。而學校之所講。逢掖之所談。幾有若屠兒之禮佛。娼家之讀禮者。是可歎也。昔子貢問子石子不學詩乎。子石子曰。吾暇乎哉。父母求吾孝。兄弟求吾弟。朋友求吾信。吾暇乎哉。子貢曰。請投吾詩。以學於子。公明宣學於魯。子三年不讀書。曾子曰。宣子居參之門。三年不學。何也。對曰。安敢不學。宣見夫子居親庭。叱咤之聲。未嘗至於犬馬。宣說之。學而未

能宣見夫子之應賓客恭儉而不懈惰宣說之學而未能宣見夫子之居朝廷嚴臨下而不毀傷宣說之學而未能宣安敢不學而居夫子之門乎若子石子公明宣之說今之學者誠不可以不知也

陸象山家於撫州金谿累世義居一人最長者為家長一家之事聽命焉逐年選差子弟分任家事或主田疇或主租稅或主出納或主厨爨或主賓客公堂之田給一歲之食家人計口打飯自辦蔬肉賓至則卮酒杯羹久留不厭晨興率子弟致恭祠堂聚揖於廳擊鼓三疊子弟一人唱云聽聽聽勞我以生天理

火之食集卷之十一
定若還懶惰必饑寒莫到饑寒方怨命虛空自有神明聽又唱云聽聽聽衣食生身天付定酒肉貪多折人壽經營太甚違天命定定定

朱文公與慶國卓夫人書云聞尊意欲為五哥經營幹官差遣某切以為不可人家子弟多因此壞却心性蓋其生長富貴本不知艱難一旦仕宦便為此官逐司只有使長一人可相拘轄又多寬厚長者不欲以法度見繩上無職事了辦之責下無吏民繫繫之憂而州縣守令勢反出已下可以凌轅故後生子弟為此官者無不傲慢縱恣觸事懵然愚意以為可且

少

為營一稍在人下職事喫人打罵差遣乃聊以成就之。若必欲與求幹官乃是置之有過之地。誤其終身。前輩愛人以德。至於如此。卓夫人乃少傅劉公子羽之配。樞密共父之母五哥。即平甫朱與劉蓋姘姪初文公之父。韋齋疾革。手自為書。以家事屬少傅。韋齋歿。文公年十四。少傅為築室於其里。俾奉母居焉。少傅手書與白水劉致中云。於緋溪得屋五間。器用完備。又於七倉前得地。可以樹有圃。可蔬有池。可魚。朱家人口不多。可以居。文公視卓夫人猶母云。姚鑄為吉州判官。以平寇論功。不數年擢守。章貢為

人豪雋喜作詩自號雪蓬嘗令畫工肖其像騎牛於
澗谷之間索郡人趙東野題詩東野題云騎牛無笠
又無蓑斷隴橫岡到處過暖日暄風不常有前村雨
暗却如何蓋規切之也居無何忤帥臣以貪劾之時
端平更化之初施行特重貶衡陽人皆服東野之先
見

漢翟公為廷尉既罷門可設雀羅乃書門曰一貴一
賤交情乃見唐李適之罷相作詩曰避賢初罷相樂
聖且斟杯為問門前客今朝幾箇來蓋炎而附寒而
棄造古然矣灌夫不負竇嬰於擯棄之時任安不負

衛青於衰落之日徐晦越鄉而別臨賀后山出境而見東坡宜其足以響千載之齒頰也

子曰道不遠人孟子曰道在邇而求諸遠有尼悟道詩云盡日尋春不見春芒屨踏遍隴頭雲歸來笑撚梅花嗅春在枝頭已十分亦脫灑可喜

宋紹興中劉光世在淮西軍無紀律張魏公為都督奏罷之命叅謀呂祉往廬州節制光世頗得軍心祉儒者不知變繩束頓嚴諸軍忿怨統制酈瑋率衆縛祉渡淮歸劉豫魏公方宴僚佐報忽至滿座失色公色不變徐曰此有說第恐虜覺耳因樂飲至夜分乃

為蠟書遣死士持遺瓊言事可成成之不可速全軍以歸虜得書疑瓊分隸其衆困苦之邇賴以安南軒言符離之役諸軍皆潰唯存帳下千人某終夕彷徨而先公方熟寢鼻息如雷

上蔡先生云透得名利關方是小歇處今之士大夫何足道真能言之鸚鵡也朱文公曰今時秀才教他說廉直是會說廉教他說義直是會說義及到做來只是不廉不義此即能言鸚鵡也夫下以言語為學上以言語為治世之所以日降也而或者見能言之鸚鵡乃指為鳳凰鸞鷟惟恐其不在靈囿間不亦異

心病妙

乎

張無垢在越上作幕官不請供給錢在館中進書不肯轉官人皆以為好名之過無垢曰既請月俸又受供給偶然進書又便受賞於我心實有不安此亦本分事何名之好貪者徃徃不魯尋思此心病也心有病人安得知我知之當自醫人既不自知病反惡人醫病猶婦人妬者非特妬其夫又且妬人之夫其惑甚矣無垢此喻甚切世降俗薄貪濁成風反相與非笑廉者諛佞成風反相與非笑直者軟熟成風反相與非笑剛者競進成風反相與非笑恬退者侈靡成

風反相與非笑儉約者傲誕成風反相與非笑譙然者賈子云莫邪為鈍兮鉛刀為鋌東坡云變丹青於玉瑩兮乃反謂子為非智風俗至於如此豈不刻士豈能長守山林長親蓑笠但居市朝軒冕時要使山林蓑笠之念不忘乃為勝耳陶淵明赴鎮軍參軍詩曰望雲慚高鳥臨水愧遊魚真想初在襟誰謂形迹拘似此胷襟豈為外榮所點染哉荆公拜相之日題詩壁間曰霜松雪竹鍾山寺投老歸歟寄此生只為他見趣高故合則留不合則拂袖便去更無拘絆山谷云佩玉而若槁木立朝而意在東山亦此意也

李驪父為昭文相嘗出六和塔題詩云往來塔下幾
經秋每恨無從到上頭今日登臨方覺險不如歸去
卧林丘驪父為相清正謹守規矩自奉如寒士書卷
不釋手薨于位謚文清

自昔士之閒居野處者必有同道同志之士相與往
還故有以自樂陶淵明移居詩云昔欲居南村非為
卜其宅聞多素心人樂與數晨夕又云隣曲時來往
抗言談在昔奇文共欣賞疑義相與析則南村之隣
豈庸庸之士哉杜少陵在錦里亦與南隣朱山人往
還其詩云錦里先生烏角巾園收芋栗未全貧慣看

賓客兒童喜得食階除鳥雀馴秋水纔添四五尺野
航恰受兩三人白沙翠竹江村暮相送柴門月色新
又云相近竹參差相過人不知幽花歆滿逕野水細
通池歸客村非遠殘尊席更移看君多道氣從此數
追隨所謂朱山人者固亦非常流矣李太白尋魯城
北范居士誤落蒼耳中詩云忽憶范野人間園養幽
姿又云還傾四五酌自詠猛虎詞近作十日歡遠為
千歲期風流自簸蕩謔浪偏相宜想范野人者固亦
可人之流也

士大夫危言峻節遷謫淒涼晚歲收用衰落懲創剝

方為圓者多矣。呂子約謫廬陵，量移高安，楊誠齋送行詩云：「不愁不上青霄去，上了青霄莫愛身。蓋祖杜少陵送嚴鄭公云：『公若居台輔，臨危莫愛身。』然以之送遷謫，向用之士則意味尤深長也。」

潁濱釋莊子曰：「魚不畏網，罟而畏鵠。」鵬畏其天也。物之畏其天，誠有可怪者。余里中一村童嘗見大蛙十數聚於汙池叢棘之下，欲前捕之，熟視乃一巨蛇蟠棘下，以次啖群蛙。群蛙凝立待啖，不敢動。又村叟見蜈蚣逐一蛇行，甚急。蜈蚣漸近，蛇不復動，張口以待。蜈蚣竟入其腹。逾時而出，蛇已斃矣。村叟棄蛇於深

山中踰旬往視之小蜈蚣無數食其腐肉蓋蜈蚣產
卵於蛇腹中也余又常見一蜘蛛逐蜈蚣甚急蜈蚣
逃入籬搶竹中蜘蛛不復入但以足跨竹上搖腹數
四而去伺蜈蚣久不出剖竹視之蜈蚣已節節爛斷
如齧醬矣蓋蜘蛛搖腹之時乃灑溺以殺之也物之
畏其天有如此者夫蛇之恣啖群蛙自以為莫已敵
矣而不知蜈蚣之能涉其腹也蜈蚣之斃蛇育子自
以為莫禦矣而不知蜘蛛之能醢其軀也世之人
昂昂然以凶毒自多者可以觀矣且蛙之不能敵蛇
固也蜈蚣小於蛇矣而能制蛇蜘蛛小於蜈蚣矣而

能制蜈蚣物豈專以小大為強弱哉

杜少陵詩云彤庭所分帛本自寒如出鞭撻其夫家
聚歛貢城闕聖人筐篚思實欲邦國活臣如忽至理
名豈棄此物即爾俸爾祿民膏民脂之意也士大夫
誦此亦可以悚然懼惻然思矣余嘗見州郡迎新者
設飾甚費因成詩云赤子須摩撫紅塵幾送迎幕張
雲匝匝車列鑑鮮明豈是股民血室教適宦情忍聞
分竹者竭澤自求盈

苗傳劉正彥之亂張魏公在秀州謀舉勤王之師苗
劉偽詔至大赦厚犒諸軍公潛於府庫中尋舊詔書

令人駝往十數里外易其詔既至令僚屬宣詔但為
撫諭之詞畧張於譙樓旋即歛之大犒諸軍羣情賴
以不搖時張俊亦在秀州公深結之會韓世忠舟師
亦至公與世忠對哭因饗世忠將士呼諸將校至前
杭聲問曰今日之事孰逆孰順皆對曰賊逆我順又
曰若浚此舉違天悖人可取浚頭歸苗傅不然一有
退縮悉以軍法從事衆皆感憤遂勒兵行次臨平遂
黨屯拒不得前世忠等搏戰大破之傅正彥遁入閩
追獲斬首拜公知樞密院事時年終三十二
趙昌父云古人以學為詩今人以詩為學夫以詩為

學自唐以來則然如嘔出心肝指擢胃腎此生精力盡於詩者是誠弊精神於無用矣乃若古人亦何嘗以學為詩哉今觀國風間出於小夫賤隸婦人女子之口未必皆學也而其言優柔醇切忠厚雅正後之經生學士雖窮年畢世未必能措一辭正使以後世之學為詩其腦中之不淳不正必有不能掩者矣雖貪者賦廉詩仕者賦隱逸詩亦豈能逃識者之眼哉如白樂天之詩曠達閒適意輕軒冕孰不信之然朱文公獨謂樂天人多說其清高其實愛官職詩中及富貴處皆說得口津津地沁出可謂能窺見其微矣

火出集卷之二
嗟夫樂天之言且不可盡信況餘人乎楊誠齋云古
人之詩天也後世之詩人焉而已此論得之
莊子謂至人入水不濡入火不熱如周公遭變而赤
芻兀孔子厄陳而絃歌自如皆至人也不濡不熱
其言心耳非言其血肉之身也

自古豪傑之士立業建功定變弭難大抵以無所為
而為之者為高三代人物固不待言下此如范蠡霸
越而扁舟五湖魯仲連下聊城而辭千金之謝却帝
秦而逃上爵之封張子房顛羸蹶項而飄然遊赤松
子遊皆足以高出秦漢人物之上左太冲詩云功成

不受賞長揖歸田廬李太白詩云事了拂衣去深藏
身與名而世降俗末乃有激變稔禍欺君誤國殺人
害物以希功賞者是誠何心哉是誠何心哉

真西山帥長沙郡人為立生祠一夕有大書一詩於
壁間者其辭云舉世知公不愛名湘人苦欲置丹青
西天又出一活佛南極添成兩壽星幾百年方鍾間
氣八千春願祝脩齡不須更作生祠記四海蒼生口
是銘

孟子言求放心而康節邵子曰心要能放二者天淵
懸絕蓋放心者自放也心放者吾能放也放心者如

雞豚出於埭柵不求則不得心放者如鷹隼翔於雲
霄而條鐵固在吾手也衆人之心易放聖賢之心能
放易放者流蕩能放者開闊流蕩者失其本心開闊
者全其本心

陳了翁雜說云言滿天下無口過非謂不言也但不
言人是非長短利害雖多言無害所謂終日言而未
嘗言此其所以無口過

趙韓王為相置二大甕於坐屏後凡有人投利害文
字皆置其中滿即焚之於通衢李文靖公曰沆居重
位實無補萬分唯中外所陳利害一切報罷之惟此

少以報國爾朝廷防制纖悉備具或徇所陳請施行一事即所傷多矣陸象山云往時充員敕局浮食是慚惟是四方奏請廷臣面對有所建置更革多下者詳其或書生貴游不諳民事輕於獻計不知一旦施行片紙之出兆姓蒙害每與同官悉意論駁朝廷清明常得寢罷編摩之事稽考之勤顧何足以當大官之膳或庶幾者僅此可以償萬一耳凡此皆至論夫子曰仍舊貫何必改作古人曰利不什不變法甚言更革建置之不可輕也或曰若是則將坐視天下之弊而不之救歟余曰不然革弊以存法可也因弊而

變法不可也。不守法則弊生非法之足以生弊也。若
韓范之建明於慶曆者。革弊以存法也。荆公之施行
於熙寧者。因弊而變法也。一得一失。蓋可觀矣。或曰
荆公有志於二帝三王之法度。豈可厚誅乎。余曰。有
志於二帝三王。當自格君心。始不當自變法度。始有
堯舜之君。則有堯舜之治。有禹湯之君。則有禹湯之
治。法度云乎哉。

朱文公有足疾。嘗有道人為施針灸之術。旋覺輕安。
公大喜。厚謝之。且贈以詩云。幾載相扶藉瘦筇。一針
遠覺有奇功。出門旋杖兒童笑。不是從前勃率翁。道

人得詩徑去未數日足疾大作甚於未針時亟令人尋逐道人已莫知其所往矣公歎息曰某非欲罪之但欲追索其詩恐其持此誤他人耳

豫章旅邸有題十二字云願天常生善人願人常行善事鄒景孟表而出之以為奇語吾鄉前輩彭執中云住世一日則做一日好人居官一日則行一日好事亦名言也

先君竹谷老人早登慶元諸老之門晚年以其所自得者著畏說一篇其詞曰大凡人心不可不知所畏畏心之存亡善惡之所由判也是以古之君子內則

畏父母畏尊長詩云豈敢愛之畏我父母又曰豈敢
愛之畏我諸兄是也外則畏師友古語曰凜乎若嚴
師之在側逸詩曰豈不欲往畏我朋友是也仰則畏
天俯則畏人詩曰胡不相畏不畏於天又曰豈敢愛
之畏人之多言是也夫惟心有所畏是故非禮不敢
為非義不敢動一念有愧則心為之震掉一事有差
則顏為之忸怩戰兢自持日寡其過而不自知其入
於君子之域矣苟惟內不畏父母尊長之嚴外不畏
儕朋師友之議仰不畏天俯不畏人猖狂妄行恣其
所欲吾懼其不日而為小人之歸也由是而之習以

成性居官則不畏三尺任職則不畏簡書攫金則不
畏市人嗚呼士而至此不可以為士矣仲尼所謂小
人之無忌憚者矣夫人之所以必畏乎彼者非為彼
計也蓋將以防吾心之縱而自律乎吾身也是故以
天子之尊且有所畏詩曰我其夙夜畏天之威書曰
成王畏相孰謂士大夫而可不知所畏乎聖賢之聰
明且有所畏魯論曰君子有三畏畏天命畏大人畏
聖人之言孰謂學者而可不知所畏乎然則畏之時
義大矣哉余每以此自警且以劾切磋於朋友云
朝廷一有計較利害之心便非王道士大夫一有計

較利害之心便非儒緒興間張登為衣溪宰視事之
日請邑之耆老人士相見首問天宇以何字對皆曰
地又問曰壤以何字對皆曰月又問利字以何字對
皆曰害張曰誤矣今只知以利對害便只管要尋利
去人人尋利其間多少事利只當以義字對因詳言
義利之辨一揖而退

王梅溪守泉會邑宰勉以詩云九重天子愛民深令
尹宜懷惻隱心今日黃堂一杯酒使君端為庶民斟
邑宰皆感動真西山即長沙宴十二邑宰於湘江亭
作詩曰從來官吏與斯民本是同胞一體親既以脂

膏供爾祿須知痛痒切吾身此邦素號唐朝古我輩
當如漢吏循今日湘亭一杯酒便煩散作十分春蓋
祖述梅溪而敷衍之

楊誠齋自祕書監將漕江東年未七十退休南溪之
上老屋一區僅庇風雨長鬚赤腳絕三四人徐靈暉
贈詩云清得門如水貧唯帶有金蓋紀實也聰明強
健享清閒之福十有六年寧皇初元與朱文公同召
文公出公獨不起文公與公書云更能不以樂天知
命之樂而忘與人同憂之憂毋過於優游毋決於遁
思則區區者猶有望於斯世也然公高蹈之志已不

可違也嘗自贊云江風索我吟山月喚我飲醉倒落花前天地為衾枕又云青白不形眼底雌黃不出口中只有一罪不赦唐突明月清風

張宣公帥江陵道經澧澧之士子十數輩執文書郊迎公喜見鬢眉就馬上長揖索其文觀之乃舉劉郡守政績公擲其文於地曰諸公之來某意其相與講切義理之是非啟告閭閻之利病有以見教今乃不然足特被十隻冷饅頭使耳躍馬徑去澧守上謁亦不容見

王荆公新法頗苛毒流寰宇晚歲歸鍾山作放魚詩

云物我皆畏苦捨之寧啖茹其與梁武帝窮兵嗜殺
而以麀代犧牲者何殊余嘗有詩云錯認蒼姬六典
書中原從此變蕭疎幅中投老鍾山日辛苦區區活
數魚

伊川謫謫渡江風浪大作舟中之人皆失色伊川正
襟端坐神色泰然既及岸有樵夫問曰公是達後如
此是舍後如此伊川登岸欲語之言已去不可追矣
余謂惟達故舍達是智舍是勇夫子曰朝聞道夕死
可矣使未聞道必有貪生怖死之心安能夕死而可
哉可者委順而無貪怖之心也朝聞道是達夕死可

矣是舍達須是平時做工夫舍則臨事自然如此
景公千駟不及夷齊顏子一瓢乃同禹稷孔孟垂教
深切著明而後世利欲之私至於包括天地蔽遮日
月太史公曰天下攘攘皆為利往天下嘻嘻皆為利
來吁可哀也哉

士卒畏將者勝畏敵者敗愛將者勝愛身者敗畏將
則不畏敵畏敵則不畏將愛將則不愛身愛身則不
愛將畏將在將之威愛將在將之恩有李光弼斬張
用濟之威則三軍股慄矣何患其不畏將有吳起吮
士疽之恩則赴死如歸矣何患其不愛將雖然戮一

不用命誅一不循律則威振矣不必數數然也至若
撫循之恩則終始有所不可廢東山之詩昵昵兒女
語此周之所以長潼關之敗唐幾亡矣而僕射如父
兄識者以是占中興焉謀帥擇將者則何以哉

光宗即位謝良齋為文昌進十銘云業成而難其敗
或易兢兢保之常恐失墜道甚簡易在尊所聞帝王
之學匪藝匪文畏天之威主德為最水旱雷風天之
仁愛存心公正治之所起毫釐之私惠及千里妄賞
不勸妄罰不畏賞罰大權以妄為忌貪吏虐民介石
莫聽獎廉以激捷於號令民之疾苦幽遠難知日問

日詢猶恐或遺財在天下。理之以義。未聞刻斂其罪。在吏亂之所生。非止夷狄姦回。諛說尤害於國。自治十全。乃可理外。重乃取輕。輕動為戒。辭簡理明。時人以此李衛公丹宸箴。又作勸農詩云。莫入州衙與縣衙。勸君勤理舊生涯。池塘多放聊添稅。田地深耕足養家。教子教孫須教義。栽桑栽柘勝栽花。閑非閑事都休管。渴飲清泉困飲茶。又云。仕宦之人南州北縣。商賈之人天涯海岸。爭如農夫六親對面。夏絹新衣。秋米白飯。鵝鴨成群。猪羊滿圈。官稅早輸。逍遙散誕。似此之人。值錢千萬。詞旨平易。足以諭俗。然其言農

夫之樂想乾淳間有之今則甚於聶夷中之詩矣寧復有此氣象哉

宋孝宗時近習梁俊彥請稅兩淮沙田以助軍餉上大喜付外施行葉子昂為相奏曰沙田唐虞江濱出沒之地水激於東則沙漲於西水激於西則沙復漲於東百姓如沙漲之東西而田焉是未可以為常也且率已兵興兩淮之田租並復至今未征况沙田乎上天悟即詔罷之子昂退逮俊彥至中書叱責之有申屠嘉之遺意

近代名臣錄

景泰三年奸臣廷請易儲之說事下廷議林莊敏公
聰時在刑科首言皇太子無過不可易憤激不肯署
名事不能阻而人諒其忠未幾遷吏科吏部選法未
當或私有所徇者輒指斥改易至屢疏劾之必置諸
理而後已當事者雖外示敬憚而中實忌之嗾御史
劾聰甥為教官因聰言得善地文致其罪以專擅選
法當死大臣當連名署奏憤次及禮部尚書胡濙驚
曰抵聰至死邪如公論何即移疾不出朝廷遣使
問之濙曰本無疾聞林聰被害心悸不安帝始知
聰為人所誣竟坐未減左選國子學正成化間歷官

右都御史掌南京院事先是為都察者能制十三道
遇事規避無所言以悅權倖士論殊不直之及聰縮
院章道中時有所彈劾當事者厭之謂聰不能幹其
屬聰曰已既不言而又過人使不言誠非聰所能也
頃襄毅公忠為廣東按察司副使時按部齊州諜報
賊携男婦數百流劫村落部將請發兵公曰流賊無
携家理慎無妄殺及訊其俘果皆良家被掠者盡釋
之

程襄毅公信嘗為太僕卿時馬政久廢朋言謂興三
營大將聯䟽謂太僕急徵諸衛馬非便請以事隸兵

部從之。公曰：如此則為不得其職矣。即移文言：太僕職專馬政，而高廟有旨，馬數不許人知。自今隸兵部使馬之增耗，太僕不得與聞。脫有警而馬不給，孰任其責？願明示為著令。兵部懼，以為言。詔復其事歸太僕。及兩掌兵政征伐俱有成績，又能任怨。南京守臣或欲與錢谷詞訟，公曰：守備機務，所以謹非常。若此乃有司之事也。斷不可預論。者以為得體。征貴州時，詔以便宜之權付之。公發兵至凱旋，不爵一人，不殺一人。同事者以為言。公曰：刑賞人主之大柄。懼間外事不集而假之人，若幸而集，又竊弄之，豈人臣之道。

也。論者以為此古名將之心。名臣之言。可以為法。

汪直新坐西廠立威擬至尊。內外官卧不帖席。商文
毅公輅疏十罪以聞。且云用此人實係天下安危。上
恚曰。用一內臣。焉得繫天下安危。太監懷恩傳旨詰
責甚厲。公正色曰。朝臣無大小。有罪皆請旨收問。渠
敢擅抄札三品以上京官。大同宣府北門鎖鑰。一日
不可缺人守者。渠一日擒械數人。南京祖宗根本重
地。留守大臣。渠敢擅自收捕。諸近侍。渠敢擅自損易。
此人不黜。國家安乎危乎。懷恩聞之。咋舌而退。即日
撤去西廠。公後致仕歸。比劉文安公見其子孫多賢。

乃歎曰某與公同處若干年未嘗見公筆下妄殺一人宜乎子孫若是公應之曰實不敢使朝廷妄殺一人也

王端毅公恕嘗問曰今學者滿天下何故異才難得蔡虛齋清對言是固有由也上之人所以養之者未盡其道下之人又幸時之昇平而售之急耳儒生少知章句訓詁人便舉而進之學宮矣未幾作經義甫成篇便得補廩為當然矣又未幾佐三場文字終可讀便迫迫期中舉中進士矣一中進士則官已到手或無暇於學或自以為無用學矣其仕而能學者無

幾且又或有過時扞格之患蓋識見既淺踐履必薄
規為必粗非不謂俟其熟而食之者也况自幼入小
學而其所學者多非學做人之實事人才之不如古
者以此故雖有異質亦不能成異才公曰然

山東右布政使夏公寅嘗語客曰君子有三惜客曰
何也曰此生不學一可惜也此日閒過二可惜也此
身一敗三可惜也客矍然避席曰名言也

定襄侯郭公登守大同初西寧侯宋英武進伯朱冕
全軍覆沒止班師將旋駕公欲有陳論不能自達
乃告學士曹鼎張益宜蒞紫荊關返鼎益曰然即當

入奏旣而行營果入紫荆公以為得請矣俄復折而東總四十餘里耳蓋竟涉居庸也未入而蒙塵矣八月二十三日虜以二千餘人奉 上皇至大同城下索金幣約賂至即歸駕公閉門不納 上皇傳旨曰朕與登有姻婭何外朕若此公遣人傳奏曰臣奉朝廷命守城不敢擅啟閉竟不出表梯以頭觸門大呼廣寧伯劉安給事中孫祥知府霍瑄乃出見有所獻瑄尤効力及如約以賄往虜笑不應竟擁駕去初公守大同當創殘之餘常恨馬少步卒追賊不及乃以已意設為攬地龍飛天網等法鑿為深塹覆以土木

人馬通行如履平地賊入圍中令人發其機自相激
撞頃刻十餘里皆陷又用砲石擊賊一發五百餘步
每人馬死者數千賊傳以為神云

僉都御史齊公明成化間乞終養歸貴溪山築早閒
亭逍遙其中詔起捕閩賊賊承詔出早閒詩有四壁
蕭然安一榻寸心虛了湛三靈之句將卒題絕句云
歸去來兮歸去來一聲長嘯入瑤臺誠明本是吾儒
事寄語吾儒莫浪猜又書一對語云平生無一事欺
天今日送百骸歸地嘗號五宜居士蓋其初乞歸號
稱無才一宜退有疾二宜退親老無昆弟三宜退及

以治盜徵謂宜再起功成疾作宜再退其號五宜以此

都督同知王公信所部都指揮劉斌張全智勇過人
公薦之於朝且云英俊之士。處心剛直。豈肯抑心低
首。奔走媚求。若不曲加延訪。則賢才多隱。志士沉匿。
任用何能廣乎。公歷鎮大邦。不營私產。嘗曰。儉足以
久。死之後。不以侈累子孫者。我所遺也。初總兵權者。
皆為子孫奏官。公但令讀書自立。無他求。劉忠宣公
大夏嘗云。予在本兵。日參用一將官。思得王若實若
人。那討得來。

秦襄毅公紘巡撫陝西時秦府旗校肆橫民苦之公
悉擒治不少貸秦王不能堪奏公欺滅憲皇怒逮
公下錦衣獄命內臣尚亨籍其家止得黃絹一疋故
衣數事亨回奏公貧狀上親閱其貲嘉歎良久詔釋
公繫且賜鈔萬貫以旌其廉調撫河南旣抵任巨璫
汪直亦以事至汪時竊弄威福聲勢烜赫他巡撫官
率屈禮以見公獨與抗禮畧不為屈汪亦知重公不
為較公乃密疏汪多帶旗校騷擾地方汪回京上
問各省撫臣賢否汪獨稱公廉能上以公疏示汪
汪叩頭伏罪稱公賢不置上釋之

丘文莊公濟弱冠時著論謂許文正公仕元無能改
於其俗又不能行已之道不仕可也耆儒碩師初見
論駭之已而大服以為先儒未有言及此者嘗修
英廟實錄或謂少保于謙之死此時猶名此當著其不軌之罪公
曰已已之變微于公天下不知何如武臣挾私怨誣
其不軌是豈可信哉良以為然初洪武永樂以來凡
百司朝覲命吏部都察院考其尤不職者黜之不過
數十人其後吏部患人言務以多黜為公方岳而下
少有微瑕輒黜之黜者亦不敢訴公深知其弊言於
上曰唐虞三載考績黜陟今有居官未半載而黜者

所黜之人未必皆實此非唐虞之法亦非祖宗舊制也上深然之

天順初楊公瑄為監察御史印馬於圻內民群訴太監吉祥忠國公石亨奪其田若干頃公具以聞併言其怙寵擅權之罪詔稱公敢言稱職命吏部記之將以大任也既而還京慧孛連見祥亨二亮日益張公與十三道御史謀劾之有私泄於亨者亨乃與祥合謀上諸暨彈章入上震怒召諸御史詣文華殿俾讀彈章而詰之公與某道御史周斌且誦且對歷陳二亮罪狀明甚天意先入諸彙能回悉下錦衣獄

逼公誣引大臣刑數瀕死卒無一語他及有司文致坐公死而十三道長皆坐戍餘多貶奏上會京城大風電拔木壞屋走正陽門下馬牌於郊外於是獄皆從減公就戍遼東鐵嶺道遇赦還或中其言諸二兇謝廢免後禍公不可後請成廢西南丹厯五歲二兇相繼以遂誅公被特旨還里憲廟嗣修以言官奏復公舊官尋陞浙江按察副使巡視海通戚化丁酉春忽報倭船數百犯邊公時在杭察案驚聞公徐回彼果來犯存將盡誅之乃行邊至寧波府備已戒嚴守令呼民壯授甲練盡公謂同海上甲兵自是內地不

須虞安用民壯今農事方殷亟散之至定海數日乃知倭僅兩船入貢耳於是皆服公之智量

欽天監五官監候楊源者浙江按察使楊公瑄之子也正德改元七月源因遂瑾亂政上䟽言占候得大角及心宿中星動搖天璿天機天權星不明因勸武皇安居深宮絕遠遊獵罷弓馬嚴號令毋輕出入闕除內侍寵倖遊逸小人節賞賜止工役親元老大臣日侍講習詩書䟽下禮部本部科道俱稱源占候之言深切時弊源復䟽言十月二十六日占候得連日雲霧交作為衆邪之氣陰冒於陽臣欺於君小人

擅權為下判上引譬甚切瑾怒矯詔杖三十釋之源
又疏之自正德二年來一向占候得火星入太微垣
帝座之前或東或西往來不一勸上宜思患預防意
在瑾也瑾大怒喚源面叱之曰爾何官亦學為忠臣
乎復矯詔痛責三十謫戍肅州行至懷慶卒於孟縣
之陽和驛妻斬蘆荻覆尸葬之

憲皇朝有建言請以天縱二字加號孔聖禮科給事
中張公寧言孔子道大德尊所貴明其理以行其道
被之天下傳之萬世不在封號求勝於一字一名可
得輕重時用公議罷之

彭惠公公韶為刑部郎中時外戚指揮周遵與圻內
民爭田顧得內臣及錦衣衛官往勘會有旨命公正
法司官以行衆皆推公公至其地環視周匝徑歸奏
曰田本民有雖其戶報不及管業然地有高下歲有
旱潦細民頻年出賦以給公上旱則資污下以補高
仰潦則資高仰以裨污下安有室閒可以別給且民
者國之本食者民之天食足則民安民安則國安豈
可以民田給貴戚重傷國本耶後詔下獄科道交章
言公無他得釋俄而復有請荒田者帝顧左右曰
彼不見周遵之事柰何又請邪立却其請

大同缺馬。馬端肅公在兵部。請給拆糧銀市之。且戒督糧官毋得沮格。旣得旨。時戶部尚書周文端公經言。糧馬各有職。不宜侵奪。且引祖訓六部不許相壓之文為據。詞甚激切。上為改命兵部以馬價銀充用。又清寧宮災。方議建修。兵部欲調山東民夫七千餘人。公曰。今歲歉。民貧。不可使遠去鄉井。請以本部羨銀。就京師顧役為之。外戚有河間賜地數百頃。欲併其傍近民田千餘頃。得之。且乞加稅畝已也加稅銀二分。公言。河間地多沮洳。比因久旱。貧民即退灘地耕之。遇潦輒沒。即欲加稅。將貽無窮之害。且王府賜田。例畝

稅二分而此獨加稅人將謂朝廷待外戚與宗親異矣又聞憲宗妃家亦有私田與民田比一切奪之彼亦無以為業又將謂朝廷待之與他外戚異矣疏三四上後有以雄縣退灘地獻為東宮庄者上因公奏皆抵之罪一時貴幸有所陳請公一裁以法皆歛不得肆

張莊簡公悅奉職守法以不欺為本在刑部時朝士有囑其所親者曰不敢撓公法但乞假一詞使知某嘗有言耳訖事而聞之曰其人無大罪既據法施之無敢偽言以市恩聞者歎服在浙江始以糊名校士

尋去之曰我且自疑人誰信我請托覲覲屹不為動而士皆帖服無敢干以私者公平居謹畏小心無疾言厲色至臨事卓有定見未嘗以恩怨利害動其心嘗謂人曰古之聖賢其過人遠甚凡所猷為皆公無私故其事業光明俊偉今之人去古聖賢亦遠矣每事竭其公忠尤恐不及况復濟之以私乎或言有善讀書不善作官者公歎曰此正不善讀書耳世豈有遵書本行而誤者冢宰去位衆望咸屬公或言內未為之地者公直視不答其人懼而退公性素清約自小官至重任始終一節歸處杜門在外公私事一

無所預時見風俗奢靡日甚益崇節儉以率子孫嘗
書揭屏間曰客至留饌儉約適情殺隨有而設酒隨
量而傾雖新親不擡飯雖大賓不宰牲匪直戒奢侈
而可久亦將免煩勞以安坐

侍郎黃公孔昭為文選郎中時持選法最慎汲汲以
人才為意嘗曰國家之用才猶農家之積粟粟積于
豐年乃可以濟飢才儲於平時乃可以濟事自頃人
矯激沽名以閉門謝客為高天下人才何由知之故
公退客至輒延見詢訪有所得必書於冊徃徃量其
才隨其地參之輿論薦於天官卿務使用各當其才

雖小官卑職亦不敢忽或因勢家干請欲私用其人輒力言其不可時既不能盡阻後其人多自敗衆始服公之正在文選者十五年

劉忠宣公大夏初為兵部郎中有中官用事獻取交南策以中旨索永樂中調軍數公故匿其籍使者旁午吏數被捶若弗聞者獨徐以利害告尚書余公子俊力言阻之事遂寢朝鮮使者為建州虜邀劫請改貢道中官有朝鮮人為之地事下兵部議將從之公曰朝鮮貢自鴨鵝關由遼陽歷廣寧過前屯而後入山海迂迴四三大鎮此祖宗微意今若自鴨綠抵前

北山海路太徑恐貽他日憂卒不泄又北虜數寇雲
中遣帥失律中外震驚調發戰守無虛日每一報至
尚書必曰劉郎中云何所言輒行行之輒效時右侍
郎缺中官欲有薦公者遣人言於尚書冀一往見公
異詞謝之然猶迫促不已乃自求尋出為福建叅政
初公郎中秩滿三載朝中諸老皆欲以太僕殿之公
知其故私語所知曰郎中轉京堂固人所欲但吾做
秀才時見府縣政事不得其平輒曰使我做時某事
當如何行某事當如何罷今幸登朝不得一親民官
非素志也况郎中一出非知府則叅議官階崇重何

為不可。但恐人負官耳。後為大司馬。曰。嘗言今日所以至此者。得叅政布政之力也。

弘治丁巳。北邊倉場糧草告乏。公以戶侍簡命。經畫瀕行。周司徒經謂公曰。邊上糧草半屬京中貴人子弟經營。公素不與此輩合。此行所謂剗取禍矣。公曰。處天下事。以理不以勢。定天下事。在近不在遠。俟至彼圖之。公至。召邊上父老。日夕講定。遂得其要領。一日揭榜通衢云。某倉缺糧幾千石。每石給官價若干。封圻內外官員客商之家。但願告報者。米自十石以上。草自百束以上。俱准告。雖中貴子弟不禁也。不兩

月倉場積蓄有餘蓋徃時糴買法有來告糴百千石
草千萬束者方准以致中貴子弟爭相為市乃轉買
邊上軍民糧草陸續運至自公此法立有糧草之家
自徃告報中貴家人即欲收糴無處得買也邊上軍
民云自公收市法行倉場有餘積私家有餘財三十
年前僅見此耳 孝宗朝一日召公面語曰事有不
可每欲召卿商量又以非卿部內事而止今後有當
行當罷者卿可寫揭帖密封進來公對曰不敢 上
曰何也公曰先朝李孜省可為鑒戒 上曰卿與我
論國事豈孜省營私害物者比乎公曰臣下以揭帖

進朝廷以揭帖顯行是亦前代斜封墨勅之弊也
陛下所行宜遠法帝王近法祖宗事之可否外付
之府部內咨之內閣可也如用揭帖日久上下俱弊
且非後世法臣不敢效順上稱善久之公平生不
以勢位自居為叅政布政都御史日遇事有當行未
嘗先洩事有疑難心未明者不以公文顯行雖於屬
官亦具手簡直述其事紙末必書名以此士大夫於
公所委事無大小無不盡心竭力圖有成績期不相
負人有言及勢要貪婪軍民有不得其所者公必盛
顏不樂於公所得為者一一思以濟之吳廷舉嘗謂

古人有言曰憂民如有病見客似無官公足以當
鈞陽馬公嘗卧病上言今天下財力大耗臣日夜思
之計無所出獨蘇松折糧銀價輕今稍增之民不病
而國用足詔下建議倪文毅公岳曰馬公國家元老
其言誰敢違之然事有大難今東南民力竭矣又復
重之因而生變誰其任之乃不果增又雲南思疊梗
化守臣議欲用兵馬公疏今中外民疲財困災異疊
見何以用兵且欲遣京朝官往諭之公言用兵之法
不足示之有餘今公之言得無示弱於天下乎使思
疊聞之或輕中國矣且京朝官諭之諭之不從則策

窮矣不如姑遣藩臣有威望者以往彼當無不服不服再議之用兵未晚也於是衆皆從之

孝廟首登大寶明日當朝用御史二人侍班糾儀湯公彝輪侍殿吉士鄒公智私造其第告曰祖宗盛時御史糾儀得面陳時務得失言下取旨近年遇事惟退而具本此君臣情分所由間隔不通也公以言奏對幸值大政維新之日請效盛時故事此太平機會也及王公恕徵聘至京智又造曰三代而下人臣不獲見君所以事事苟且老先生勿受官職先請見君時政之不便者歷歷陳於上前廢其有濟一受官職

再無可見之時矣二公善其言而莫能用識者譏之
初丁未冬星變智抗章言事極論陰陽之理至欲黜
萬安劉吉尹直而用王竑王恕彭韶且曰君子所以
不進小人所以不退大抵宦官有以陰主之也疏入
不報會己酉言事者誣知州劉欒御史湯孫妄言朝
政嫉智者因跡智名下錦衣獄智身親三木僅餘殘
喘神色自若無所屈撓供詞畧云智與今湯孫等來
往相會或論經筵不宜以大寒大暑輟講或論午朝
不宜以一事兩事塞責或論紀綱廢弛或論風俗浮
沉或論生民憔悴無賑濟之策或論邊境空虛無儲

蓄之具議者欲處以死刑部侍郎彭公韶辭疾不為判案獲免左遷廣東石城吏目毅然就道衣結屨穿幾不能存親識饋遺堅却不受其寫懷詩有曰人到白頭終是盡事垂青史定誰真夢中不識身猶繫又逐東風入紫宸辭朝詩有曰盡披肝膽知何日望見衮裳只此時但願生年無一事孤臣萬死更何悲其慷慨忠愛之意溢於言表

孫忠烈公巡撫江西蒲臬諸公以都憲行臺舊隘居者輒病議當卜築別建公曰有正人無邪地際此民窮財匱而為我造新衙門乎第令加葺於後堂檻下

隱故溝獲一古鏡背篆字二十有八有昭明光運忠
扶日月等語識者以為公抗節死難之兆云

武宗北狩人心危疑時兵部職方郎中黃公鞏以母
喪服除或尼其行鞏題其書屋曰茅屋石田為生太
拙鴟夷馬革自許何愚蓋有志於徇國補武選郎中
己卯春有旨南巡時寧藩蓄逆上下以為憂鞏以其
事出江彬誘惑彬方席寵擅權無敢指及之者鞏獨
抗疏言彬首開邊事以兵為戲亮狠傲誕無人臣禮
外挾邊卒內擁兵權騎虎之勢不亂不止疏奏彬大
怒必欲寘之死遂下詔獄廷曉五日杖百餘除名以

詩遺弟曰不用汝謀方至此。須知我道固當然。及歸杜門著述。家素貧。客至留欸。貸米鄰村。日中未舉火。亦不以屑意。嘗曰。人生仕宦。至公卿。大都不過三四年。惟立身行道。為千載不朽。世之人。徃徃以彼易此。何邪。

宸濠之變。許忠節公達不屈。挺立受刑。觀者壯之時。父家居聞。江西有變。殺一副使。輒為位。易服而哭。人恠問之。父曰。此必吾兒也。此其素志。今果然矣。陳白沙憲章自臨川。歸足跡不至城府。閉門讀書。徹夜不寢。小困則以水沃其足。夕之乃歎曰。夫學貴乎。

自得也自得之然後博之以典籍則典籍之言我之言也否則典籍自典籍而我自我也遂築一臺曰春陽靜坐其中足不出閨外者數年

正德己巳逆瑾括民田遼東人驚疑思亂義州先發聚衆縱火劫財城中大擾然相戒曰毋入東街驚賀老爺給事中賀公欽也鄉人以告遂請先生往撫先生辭曰吾非上官獲保里閭足矣請之再三遂從敏幹子弟十餘人往彼即拜跪言此事恐不能保全乞示生路先生曰渠輩既知悔即不殺人便可解衆稍戢俄而相率至東街巷口羅跪再請先生曰爾等燒

屋劫財皆可抵償惟殺人不可赦明後日鎮城當有
體勘人來爾輩須拜跪求生耳慎無殺人已而撫鎮
人果至須臾又報發軍來勦衆復呼譟相聚曰賀老
爺不曾說謊我輩再往問之先生曰城中被爾等擾
亂至此鎮城焉得不戢兵兵雖至爾等第不殺人當
有原宥衆復退數日竟如其言城中不傷一人

丹鉛餘錄

朱文公談道著書百世宗之愚詳觀其評論古今人
品誠有違公是而遠人情者王安石引用姦邪傾覆
宗社元惡大憝也乃列之名臣錄稱其文章道德文

章則有矣。烏有引用姦邪而可名為道德耶？蘇文忠公文章忠義，古今所同仰也。乃力詆之，謂得行其志，其禍甚于安石。孔子曰：吾之於人也，誰毀誰譽？如有所譽，其有所試。文公解之曰：善善速而惡惡則已緩矣。又曰：但有先褒之善而無預詆之惡，信斯言也。文公於此惡惡得為緩乎？無乃自蹈於預詆人之惡也？夫以安石之姦，則未減其已著之罪，以蘇子之賢，則巧索其未形之斑，此心何心哉？或曰：不惟此也。秦檜之姦，人欲食其肉者也；文公稱其有骨力。岳飛之死，天下垂涕者也；文公譏其橫。又譏其直向前，廝殺漢

儒如董賈之流皆一一議其言之疵匡衡之言頗純粹無疵文公則曰匡衡有好懷挾其不成人之美例如此諸葛亮則名之為盜又譏其為申韓陶淵明則譏其為莊老韓文公則文致其太顛往來之書疊疊千餘言力詆之必使之不為全人而後已蓋自周孔以下無一人逃其議古人謂君子當於有過中求無過不當於無過中求有過文公語錄論人皆無過中求有過者也觀其與同時二三同道私地評論之說直似村漢罵街詞訟訐單豈有道者氣象邪或者門人記錄之過朱子無忠臣遂至此歟

古人文法皆有祖韓非內儲說曰門人求水而夷射
誅濟陽自矯而二人罪鄭袖言鼻惡而新人剗費無
忌教郤宛而令尹誅陳需殺張壽而犀首走燒芻唐
而中山罪殺老儒而濟陽賞班固漢書曰子翬謀桓
而魯隱危栾書構卻而晉厲弑豎牛奔走叔孫卒郈
伯毀季昭文遂費忌納女楚建走宰嚭譖胥夫差喪
李園進妹春申斃上官譖屈懷王執趙高敗斯二世
縊伊戾坎盟宋痤死江充造蠱太子殺息夫作姦東
平誅宋景文唐書效之為姦臣贊曰三宰嘯凶牝奪
辰林甫將藩黃屋奔鬼質敗謀興元威崔柳倒持李

宗覆東坡贈宋壽昌詩用此法又奇矣

諺曰慈不掌兵義不主財。君子曰惟慈掌兵惟義主財。論語曰仁者必有勇非慈何以掌兵。易曰理財正辭禁民為非曰義非義何以主財。不慈掌兵賊也不義主財盜也。

火葬外明者薪之盡也神知外見者朴之散也故曰聖人以此洗心退藏於密

寧為玉碎毋為瓦全寧為蘭摧蕙折不作蒲芬艾榮寧載於義而死不載於地而生志士烈夫古今一揆乎行川之水無不盈之科走盤之珠無可留之影故

曰神不可測化不可為

鐸以聲自穴膏以明自鑠虎豹之文來射猿狖之捷
來措直木先伐甘井先竭翠以羽殃身蚌以珠致破
以木擊木則拌以水投水則散以冰投冰則沉以塗
投塗則陷詩曰載胥及溺

將飛者翼伏將奮者足踟將噬者爪縮將文者且朴
孫武云始如處女教人開戶後如脫兔教不及拒范
蠡曰見之似好煩奪之似懼虎故曰時至則應心暇
者勝又抗兵相加衰者勝矣夫惟鳴門之不爭故埃
下莫能與之爭

蚩尤五兵李斯篆書苟便於世人其舍諸縣之城也
築之瓦也秦之邊防也隋之漕河也至今賴之故曰
善用人者無棄人善用物者無棄物

鬼谷子書有捭闔篇捭青擺捭之者開也言也陽也
孟子所謂以言飮之也闔之者閉也默也陰也孟子
所謂以不言飮之也

松窗寤言

君子不幸而知於小人宜早決斷焉小人豈誠於好
德者乎姑藉以厭群論矜已黨焉爾易曰包承小人
吉大人否包者外相容也然內實異也故否君子小

人非可共事故薰蕕不同器比其睽而去之已汚身
矣荀爽之於董卓楊氏之於蔡京范相調停可喪邦
也易曰介于石不終日夫子贊曰萬夫之望

詩桑柔狀小人之惡三凉言刻薄也盜言貪黷也競
言強禦也易解狀小人之情四狐言媚惑也乘言僭
竊也拇言依附也隼言悍鷙也

賀醫問篤行淵雅確乎不移亦管幼安之流亞與教
人惟主小學達序矣陳白沙謂其亡所見勸讀佛書
豈名教之外猶有別傳乎

陳御史莆田人棄官養母灌園執蔬太守閔其勞遣

二力助汲閱三日往白守曰是使野人添事而溢口
食也還之論者曰孝廉詣極矣先倅吉安明允公恕
民立祠歲享云

灼艾餘集卷之一終